


Inihahandog ng
Bibliya Para sa mga Bata



Ang Langit,
ang magandang
tahanan ng
Diyos



Isinulat ni: Edward Hughes

Inilarawan ni: Lazarus

Ibinagay ni: Sarah S.

Isinalin ni: Anne T.


Inilimbag at ipinamamahagi
ng Bible for Children
www.M1914.org

©2009 Bible for Children, Inc.

Pahintulot: Ang materyal na ito ay maaaring makopya o malimbag,
ngunit hindi maaaring ipagbili.



Habang si Hesus ay nasa lupa, ibinabahagi Niya sa Kanyang mga disipulo ang tungkol sa langit. Tinatawag Niya itong "Tahanan ng Aking Ama", at sinabi na doon ay may maraming mansion. Ang langit ay malawak at mas maganda kaysa sa ano mang mansion dito sa lupa.



Sinabi ni Hesus, "Ako ay hahayo at maghahanda ng lugar para sa iyo. At kung Ako ay hahayo at maghahanda ng lugar para sa iyo, Ako ay babalik at ikaw ay tatanggapin ko sa Aking sarili."



Si Hesus ay pumunta nga sa langit, matapos na Siya ay mamatay at mabuhay muli. Habang pinagmamasdan ng kanyang mga alagad, si Hesus ay unti-unting umakyat sa langit hanggang sa Siya ay matakpan ng mga ulap at mawalay sa kanilang paningin.





At simula noon, patuloy na inaalala ng mga Kristyano ang pangako ni Hesus na sila ay kukunin sa Kanyang muling pagbabalik. Sinabi ni Hesus na Siya ay babalik sa panahong hindi inaasahan. Pero paano na yung mga taong namatay bago pa Siya dumating? Sabi ni Hesus sila ay hahayong kasama ni Hesus at makakapiling ang Diyos.




Kasama ang
Diyos




Ang Pahayag, ang huling aklat sa Bibliya, ay nagsasabi kung gaano kaganda ang langit. At ang pinakahanga-hanga ay ito ang tahanan ng Diyos. Ang presensya ng Diyos ay nasa lahat ng dako, subalit ang kanyang trono ay nasa langit.




Ang mga anghel at ibang mga nilalang sa langit ay nagpupuri sa Diyos. Ganoon din ang mga anak ng Diyos na pumanaw at pumaroon sa langit. Sila ay umaawit ng natatanging papuri at pagsamba sa Diyos.




Kabilang sa mga awiting kanilang inaawit ay: IKAW
AY NARARAPAT NA PURIHIN SAPAGKAT KAMI
AY IYONG TINUBOS NG
IYONG DUGO, ANG BAWAT
ANGKAN AT BAYAN, AT
GINAWA MO KAMING MGA
HARI AT MGA
SASERDOTE
NG DIYOS.
(Rev. 5:9-10)



Ang pinakahuling pahina ng Bibliya ay naglalarawan ng langit bilang isang "Bagong Herusalem". Ito ay malawak at may matataas na mga pader. Ang mga pader ay gawa sa batong jaspe na kasing linaw ng kristal.




At binabalot ng mahahalagang bato ang pinakahaligi na kumikinang sa ganda ng mga kulay. At ang bawat pintuan nito ay gawa sa isang magandang perlas.




Ang mga magagandang pintuang iyon ay hindi kailanman magsasara. Halika tignan natin kung ano ang nasa loob... WOW! Ang langit pala ay lalong mas maganda sa loob. Ang lugar ay gawa sa purong ginto, na kasing linaw ng kristal. Maging ang daan ay gawa sa ginto.




Ang malinaw na tubig ng batis ng buhay ay umaagos galing sa trono ng Diyos. Sa kabilang banda ng batis ay mga Puno ng Buhay, na siyang unang natagpuan sa hardin ng Eden. Ito ay isang katangi-tanging puno na namumunga ng labing dalawang uri ng bunga, isa sa bawat buwan. At ang kanyang mga dahon ay nagpapagaling sa bayan.



Hindi na kailangan ng araw at buwan sa langit para magkaroon ng liwanaganag. Sapagkat ang kaluwalhatian ng Diyos ang nagbibigay ng kahanga-hangang liwanaganag. Wala ng gabi at dilim sa Langit.




Maging ang mga hayop sa langit ay hindi karaniwan. Lahat sila ay maaamo at mabait. Mga lobo, mga tupa, sila ay sama-samang kumakain sa damuhan. Maging ang mga mababangis na lion ay kumakain na rin ng dayami katulad ng mga baka. Sabi ng Paginoon, "Sila ay hindi mananakit o maninira sa lahat, at sila ay mananahan dito sa Aking banal na bundok."



Habang tayo ay namamasyal
sa langit, ating mapapansin
na may mga bagay
na wala roon.

Walang
kahit
anong
pangit
na salita
tayong
maririnig.
Walang
nag-aaway
at nagdadamot.




Wala ng susi ang mga pinto, dahil wala ng magnanakaw sa langit, wala nang sinungaling, mamamatay tao, mga mangkukulam, at lahat ng mga taong masasama.




Sa langit, sa piling
ng Diyos wala ng luha.
Minsan, umiiyak ang mga
anak ng Diyos sa matinding
kalungkutan sa buhay. Sa
langit, papahirin ng Diyos
ang lahat ng mga luha.




Maging ang kamatayan ay wala na sa langit.
Ang mga anak ng Diyos ay makakasama na Niya
magpakailanman. Wala ng kalungkutan, wala
ng pag-iyak, wala
ng paghihirap.




Wala ng sakit, hindi na magkakahiwalay, wala ng ililibing. Ang lahat ay punong-puno ng kagalakan sa puso sa piling ng Diyos magpakailanman.



At higit sa lahat, ang langit ay para sa mga batang lalaki at babae (maging ang kanilang mga magulang!) na nanampalataya kay Hesus bilang Panginoon at tagapagligtas.



Sa langit, mayroong aklat na tinatawag na "Aklat ng Buhay". Puno ito ng mga pangalan ng mga tao. Alam mo ba kung kaninong mga pangalan ang nakasulat doon? Lahat ng tao na ibinigay ang kanilang buong pagtitiwala kay Hesus. Naroon kaya ang iyong pangalan?



Ang pinakahuling salaysay sa bibliya patungkol sa langit ay nagsasaad ng napakagandang imbitasyon.



"At ang Espiritu at ang babaeng ikakasal ay nagsasabi, 'Halika!' At siya na nakarinig ay magsabing 'Halika!' At siya na nauuhaw ay lumapit. Ang sino man ang may nais na kumuha ng tubig ng buhay ay kumuha ng walang bayad."



Ang Langit, ang magandang tahanan ng Diyos

isang kuwentong nanggagaling sa
Salita ng Diyos, ang Bibliya,

makikita sa

Juan 14; 2 Corinto 5; Pahayag 4, 21, 22

"Ang bukas ng iyong mga Salita ay
nagbibigay ng liwanag." Mga Awit 119:130





Ang Wakas

Sinasabi sa kuwentong ito mula sa Bibliya ang tungkol sa ating kahanga-hangang Diyos na Siyang lumikha sa atin at nais Niya na makilala natin Siya.

Alam ng Diyos na tayo'y nakagawa ng masasamang bagay na tinatawag Niyang kasalanan. Ang parusa sa kasalanan ay kamatayan ngunit lubos ang pagmamahal ng Diyos sa atin kaya't ipinadala Niya ang Kanyang Anak na si Hesus na Siyang napako at namatay sa Krus upang pagbayaran ang ating mga kasalanan.

Subalit hindi nanatiling patay si Hesus. Nabuhay Siyang muli at bumalik sa langit! Kung mananampalataya ka kay Hesus at hihingi ng kapatawaran sa iyong mga kasalanan, papatawarin ka Niya. Siya ay darating at mananahan sa iyong buhay magpakailanman.

Kung ibig mong maligtas at mapatawad sa iyong kasalanan, narito ang isang panalangin na maaari mong tularan:

"Mahal kong Diyos, naniniwala po ako na si Hesus ay namatay para sa akin, ngunit Siya ay nabuhay muli. Tinatanggap ko po kayo sa aking buhay at patawarin Ninyo po ako sa aking mga kasalanan upang ako'y magkaroon ngayon ng bagong buhay, at sa isang araw ay makasama Kayo magpakailanman. Tulungan po Ninyo akong mamuhay bilang Inyong anak. Amen."

Basahin ang Bibliya at manalangin sa Diyos araw-araw! Juan 3:16

